



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

**Occupatio animae Jesu Christo crvcifixo devotae.**

**Leroy, François**

**Pragae, 1666**

§.2. Amantem animam omnibus propemodum in rebus dilecti passionem  
agnoscere.

[urn:nbn:de:hbz:466:1-47123](https://nbn-resolving.org/urn:nbn:de:hbz:466:1-47123)

L. 1. Vit.  
cap. 17.

*Domina* (inquit) *quod mihi Deus obtulit: & tamen Pater ad-  
huc me verabit Religiosum fieri?* Ita mens bona in succum  
suum vertit omnia, & (quæ amantium est indoles) de mini-  
mis etiam vestigijs, divinæ super se sapientiæ consilia, &  
quasi voces Dei se vocantis, venatur.

In epitom.  
c. 8. §. 1.

Addere libet, quod his pridem scriptis legere contigit,  
apud religiosum oculatumque testem Joannem Gonzalez  
Hispanum ex Ordine S. Augustini: quod nempe juxta Mo-  
nasterium S. Catharinæ de Badajia ejusdem Ordinis, in ipso  
colle lapilli legantur, perfectam cordis figuram habentes,  
impressis notis quinque decussatim implexis, Christi vulne-  
rum formam referentibus, & S. Catharinæ rotam exprimen-  
tibus: cujusmodi quosdam se quoque ibidem vidisse &  
collegisse testatur.

Nonnulla his affinia, aut etiam mirabilia, videri  
possunt apud Joannem Nider in Formicario l. 4. c. 6.

### §. 2.

*Amantem animam omnibus propemodum in rebus dilecti  
passionem agnoscere.*

**V**erùm ista quoque, ijs quas dixi rebus, inscripta passio-  
nis Christi monumenta, etsi magnam per se vim ha-  
bent, ad id tamen quod isto capite exequendum suscepi, mi-  
nùs faciunt: quippe quæ extra usum communem posita, &  
certis duntaxat contenta locis, utilitatem ac fructum non  
ita latè patentem habeant.

In primis igitur id adjungimus: Christum Dominum  
vehementer amanti, & in ejus amarioribus doloribus commedi-  
tandis exercitato, non fore admodum difficile, omnibus  
propemodum in rebus passionis ejus argumenta aliqua re-  
cognoscere, iisque conspectis revocare animum ad piam  
dilecti pro ipsis passi recordationem.



Ut enim profanus amator, non modò ad imaginis aspectum quæ dilectæ formam referat, verùm rei cuiusvis, quæ ullo modo ad eam pertineat, aut ab ea profecta sit, uniusquam etiam capilli, ræniolæ, floris, aut reculæ alterius eijusmodi, consideratione, quam ut favoris notam ab amata acceperit, inardescere solet; suisque impuris ignibus, pabulum undelibet invenit: ita in his flammis ardoribusque sanctioribus, Christum diligenti, res omnis, quæ quomodo-cunque respectum ad illum habeat, facilè offert dilecti memoriam; & cum in omnibus eum quærat, fit quoque ut illum in omnibus invenire videatur.

Itaque de B. Jacobo Tudertino (quem Jacoponum, *Rader. in vit.* vulgò dicimus) proditum accepimus: cum ardenti quodam Jesu Christi amore æstuaret, eumque semper in corde, semper præ oculis mentis haberet, quandoque obviarum arborum unam aliquam esse complexum, & quasi si ulnis Christum stringeret, inter amplexus exclamasse: *O dulcis IESU! ô suavis IESU! ô IESU amantissime!* Quemadmodum jam antè observârat S. Bonaventura; post sanctas lacrymas, aut passionis Christi attentam considerationem, homini Deum amanti ita subinde efferri cor & effervesce-re; *ut præ exultatione nimia, admodum ebrj præcipitanter gradiatur, quietem non suslinens; & creaturas quas invenit, sui Creatoris amoris magnitudine, amplectetur.* *P. 3. Sim. cap. 6.*

Nec absimile multùm quod de B. Catharina Genuensi legimus: eam cum assiduo dilecti amore langueret, atque ardoris vim depascentis intima ferre non posset, quò ei nonnullum velut laxamentum quæreretur, in hortulo subinde deambulare solitam, & cum ipsis plantis arboribusve, ac si æstus suos intelligerent, sermocinari: *Et nonne vos, inquit, Dei mei partus & genus estis? nonne ejus imperia ac nutus etiam sentitis; & ubi de vobis quidpiam ille postulaverit, summa observantiâ atque alacritate paretis?* Ita illa in rebus omni- *Vit. c. 27.*



mnibus, non tam quid essent, quam à quo essent, intuebatur. Quo modo etiam S. Franciscus, creatas res omnes, nec rationis modò, sed etiam sensùs expertes, ut Solem, Lunam, elementa, fratrum ac sororum nominibus compellabat; agnoscens in ijs communem omnium parentem Deum; qui, ut dicitur in libro Job, est pluvie Pater, & genuit stillas roris; & de cujus utero egressa est glacies, &c.

cap. 38.

Itaque propius ad rem nostram; quemadmodum idem vir sanctus, quod superius observavimus, in quovis agnello aut vermiculo Christum pro se passum, contritum, immolatum intuebatur, eoque aspectu concitabatur ad ejus dolores commiserandos, atque lugendos: ita solers & piè in Crucifixum affectus animus, in rebus alijs ejusmodi, non difficilè inveniet similem aliquam passionis Christi recogitandæ materiam. Velut de se scribit Vbertinus de Casali: didicisse nimirum, tum fratris Joannis Olivi (quem Seraphicæ Sapientiæ Doctorem appellat) tum maxime Jesu interius docentis, magisterio; in omni aspectu cujuscunque creatæ naturæ, quasi ubique intueri dilectum, & seipsum semper sentire cum Jesu mente & corpore crucifixum.

Prolog. 1.  
arb. Sit.

Ann. 1213.  
n. 37.

Idem S. Franciscus (teste Luca Wadingo in Annalibus) ad aspectum petrarum fissarum in monte Alvernæ vulnerabatur animo; memor videlicet mortis Unigeniti Dei, quam conscie rupes, & ipso tanquam dolore ruptæ, hodieque testarentur.

In epist. de  
S. Cathar.

De S. Catharina Senensi scribit B. Stephanus Carthusianus, qui priusquam id institutum suscipere, cum sancta Virgine diu familiariter versatus est: eam, cum in rebus universis Deum quæreret inveniretque, florum tamen contemplatione in primis teneri, atque inde ad Deum ascendere solitam: auditamque à se testatur, cum, ad floridi prati occursum, ad comites diceret: *Num animadvertitis, quemadmodum res universæ conditorem suum commendant ac prædicant?*



dicant? *Me sanè flores hi purpurei apertè commonent plagarum Salvatoris mei.* Floris rosæ aspectu compungebatur S. Basilius; prout ipsemet scribit homiliâ de Paradiso: *Florida quidem est rosa, inquit; sed mihi tristitiam insiguit. Quoties florem hunc video, peccati mei admoneor, propter quod terra, ut spinas & tribulos proferret, condemnata est.* Potuit is ipse, potest & quilibet vir pius, rosarum quoque aut verprium ac tribulorum aspectu, admoneri spinarum, quibus Domini vertex fadè compunctus & laceratus est; eadèmq; arte plerisque alijs in rebus Dominicæ passionis notas & quasi vestigia deprehendere: præsertim adjunctâ, eâ quam subijcio, consideratione.

## §. 3.

*Ad eundem finem quædam latè patens, sed magis arcana, consideratio.*

VERùm subtiliùs consideranti, offert se quædam latissimè patens, sed magis arcana & recondita ratio; quâ rerum omnium quæ nos circumstant, vel quas ad vitæ necessitatem ac cultum adhibemus, aspectu atque usu, non admodum difficili negotio, passionis ac mortis Salvatoris nostri admoneamur: si nimirum eas non secundum externam speciem, quam sensibus nostris ingerunt, aspicere; sed ut quædam tormentorum ac necis ejusdem Salvatoris instrumenta, intueri condiscamus.

Nam, præterquam quòd pleræque omnes, sive vi suâ naturali, sive carnificum malignitate ad Christi cruciatus amplificandos reipsâ convenère (uti deprehendet, qui res omnes quæ in universo sunt, ad ipsam cruciamentorum Christi multitudinem ac varietatem comparare instituerit) nulla ferè res est earum quæ in sensus nostros & usus cadunt, quæ non aliquâ ratione sceleribus nostris argumentum ac materiam, adeoque & mortis Christi causam, non præbuerit.

Atque